



IZVJEŠTAJ 2024

IZVJEŠTAJ O RADU SAVEZA BH UDRUŽENJA U ŠVEDSKOJ ZA 2024 GOD.

UVOD

Savez bosanskohercegovačkih udruženja u Švedskoj (u daljem tekstu Savez) osnovan je 7. juna 1992. godine kao nepolitička i religiozno neovisna organizacija u koju se građani učlanjuju dobrovoljno na demokratskim principima. Glavni cilj Saveza u početku je bio prikupljanje humanitarne pomoći narodu u BiH. Kako Republika Bosna i Hercegovina u to vrijeme nije imala svoje diplomatsko predstavništvo Savez je organizovao aktivnosti na širenju istine o karakteru rata u RBiH. Kasnije će se u ciljeve rada uključiti borba za pravo na vlastiti jezik, za očuvanje kulture i tradicije, bh. identiteta. U narednim godinama, Savez će imati preko 120 udruženja sa oko 16.000 članova.

U 2024. godini Savez ima 35 udruženja sa 5 984 članova. Kancelarija Saveza je u Norrköpingu. Od 2024. god. u Savezu nema profesionalno zaposlenih s tim da jedno lice idealno obavlja dužnost sekretara. Savez se u 2024. god. finansirao isključivo uplatama članarine udruženja svojih članica, a djelimično i putem projekata u okviru NBV-a čiji je Savez punopravni član.

Savez je član i jedan od osnivača Svjetskog saveza dijaspore BiH (SSDBiH). Savez saraduje sa institucijama i organizacijama u Švedskoj i BiH: BiH ambasadama u Stockholmu, Kopenhagenu i Oslu, Bosanskohercegovačko-švedskim savezom žena (BHŠSŽ) i MDD Merhamet.

Također je kroz aktivnosti vezane za maternji jezik ostvarenasradnja sa Institutom za jezik u Sarajevu, Muzičkom akademijom u Sarajevu kroz rad i djelovanje Folklornog ansambla Saveza, Ministarstvom za civilna pitanja, raseljena lica i izbjeglice, i Ministarstvom za vanjske poslove BiH.

IZVJEŠTAJ

Ciljevi i zadaci Saveza ostali su gotovo isti kao i 1992. godine s tim da se humanitarna pomoć usmjerava putem MDD Merhameta Švedske. Aktivnost na očuvanju bh. identiteta, jezika, kulture, i tradicije je aktuelna u mnogo većem stepenu. U Švedskoj stasaju generacije rođene u ovoj zemlji. Ovaj Izvještaj bio bi puno potpuniji da sadrži više podataka iz rada udruženja a ne samo organa Saveza. Važno je napomenuti da je ukidanje državne potpore etničkim organizacijama dovelo Savez u najtežu ekonomsku situaciju od njegovog osnivanja Saveza.

Skupština Saveza održana je u subotu, 02. juna 2024. godine (digitalno). Na Skupštini su izabrani Glavni odbor i komisije u sastavu:

Adnan Mahmutović – predsjednik
Almedina Sačić – potpredsjednik

Članovi GO: Melina Glavaš, Meho Kapo, Mirsad Klinac, Ekrem Sehić,
Azra Lokvančić, Ljutvo Kadirić, i Jasmina Burzić

Zamjenici članova GO: Nazmija Konjević, Edin Crnalić

Nadzorni organ: Mirza Demirović, Hamid Alić i Senad Hujić

Kandidaciona komisija: Senadin Bečirbegović, Muhamed Cerić i Larisa Muslijović

U toku 2024 god. održano je 6 sjednica Glavnog odbora Saveza: 9. mart, 2. maj, 2. juni, 16. septembar, 14. oktobar, i 26. decembar.

ČLANSTVO

2024. godina je godina u kojoj su uloženi naponi da se utvrdi stanje broja članova. Osjetan je pad broja članova u u zadnjih par godina. U 2024. godini dolazi do povećanja aktivnost nakon pandemije ali je ipak zabilježen manji pad članstva u sekcijama.

Pregled udruženja i članstva po godinama:

2012 - 55 udruženja- 10 486 članova
2013 - 44 udruženja - 9263 člana
2014 - 48 udruženja- 9656 članova
2015 - 48 udruženja- 8662 člana
2016 - 49 udruženja- 8391 član
2017 - 45 udruženja - 8360 članova
2018 - 45 udruženja - 8148 članova
2019 - 38 udruženja - 7024 člana
2020 - 38 udruženja - 6905 članova
2021 - 40 udruženja - 7600 članova
2022 - 38 udruženja - 7145 članova
2023 - 40 udruženja - 6417 članova
2024 - 35 udruženja - 5984 članova

MUCF

MUCF je obavijestio Savez da je Vlada Švedske ukinula državna dotacija organizacijama koje su formirane na nacionalnoj-etničkoj osnovi. To znači da Savez nije dobio sredstva za 2024. godinu ali je bio obavezan da ispuni obaveze profesionalne revizije za 2023. god. Savez je do 31. decembra 2024. god. otkazao sve materijalne troškove osim kancelarije Saveza.

SARADNJA SA AMBASADOM

Savez je imao kvalitetne i stalne komunikacije i projekte sa Ambasadom Bosne i Hercegovine i pružao je pomoć u segmentima vezanim za reprezentaciju bh dijaspora u Švedskoj a prema Švedskim i BiH vlastima, u poljima privrede, historije i kulture. N.J.E. Bojan Šošić je učestvovao na svim eventima u organizacija Saveza, kao i u radu i planiranju aktivnosti važnih za BiH i dijasporu u Švedskoj.

SWEDAVIA

U prvoj polovini 2024. god., a na inicijativu iz jednog od udruženja, Savez je pokrenuo razgovore sa Swedavia o aviolinijama Švedska-BiH. U razgovore su zatim uključeni Ambasada BiH u Švedskoj kao i osobe stručne u ovom polju djelovanja. Swedavia je sa Savezom napravila anketu na koju je odgovorilo 3300 osoba, čime je Swedavia bila izuzetno zadovoljna. Na osnovu informacija Swedavia se aktivnije uključila u rad na uspostavljanju novih linija.

DAN NEZAVISNOSTI BIH 1. MART. 2024. GODINE

Obilježavanje 01.03.2023, 30 godina Dana nezavisnosti države Bosne i Hercegovine, organizovano je od APU Network uz prisustvo predstavnika Savez bosanskohercegovačkih udruženja. Uvaženi gost večeri, Nj.E. Ambasador Bosne i Hercegovine u Švedskoj g. Bojan Šošić je podsjetio na okolnosti prije i poslije referendumskog DA. U fokusu su bili poduzetništvo i ekonomski razvoj Bosne i Hercegovine, to umrežavanje naših ljudi kako bi se pospješila suradnja sa Vanjskotrgovinskom komorom BiH i ulaganje u domovinu.

DAN BIJELIH TRAKA



Dan bijelih traka obilježen je u Stockholmu predavanjima Prof. David-a Pettigrew-a, Fabrice-a Dekoninck-a i Satka Mujagića u Riksdag-u. Zatim je Dan bijelih traka obilježen 31. maja u Kista Folkhögskola u saradnji sa Ambasadom BiH u Švedskoj i APU Network kroz otvoreno predavanje Prof. David-a Pettigrew-a.

OBILJEŽAVANJE DANA SREBRENICE



BiH Udruženje Norrköping je na dostojanstven način, prigodnim programom i uz prisustvo Ambasadora N.J.E. Bojana Šošića, obilježilo Dan sjećanja na genocid u Srebrenici, 11. jula 2024. godine.

POSJETA DENISA BEĆIROVIĆA



U okviru zvanične posjete Švedskoj predsjedavajući Predsjedništva BiH dr. Denis Bećirović posjetio je Ambasadu Bosne i Hercegovine u Kraljevini Švedskoj gdje su predstavnici Saveza BH (Adnan Mahmutović i Meho Kapo) imali priliku da s njim razgovaraju i predoče svoje viđenje stanja bh dijaspore u Švedskoj i probleme na koje Vlada BiH treba da obrati pažnju i rješava u saradnji sa bh dijasporom.



AKTIVNOSTI ODBORA ZA KULTURU

Manifestacije u oblasti kulturnog stvaralaštva bile su i u protekloj godini glavni sadržaj ukupnih aktivnosti u našim udruženjima kroz folklorne i horske sekcije, koje su se predstavljale na regionalnim i saveznim smotrama, održavajući članstvo u aktivnom statusu. Činjenica je da se posljednjih godina smanjivao broj udruženja, pa tako i sekcija. Međutim ispunili su se osnovni zadatci.

Uspješno se organizovalo nekoliko regionalnih manifestacija, a na kraju i Savezna smotra školstva i kulturnog stvaralaštva, 07. decembra u Gislaved-u u organizaciji Saveza i NBV-a kao glavnih pokrovitelja, te suorganizatora domaćina udruženja Bosna i Hercegovina Gislaved. Sprovedene su cjelodnevne aktivnosti u dva djela: Svečana akademija povodom Dana državnosti BiH te 27 Savezna smotra kulture i školstva koja je bila takmičarskog i revijalnog karaktera.

Svečana akademija povodom 25. novembra Dana državnosti BiH sadržala je prigodna obraćanja predstavnika domaćina i člana GO Saveza Mehe Kape, zatim predsjednika Saveza Adnana Mahmutovića, Predsjednika predsjedništva BiH Željka Komšića putem video linka, i N.J.E. Bojana Šošića.

Na Saveznoj smotri učestvovalo je 10 bh. udruženja. Oko 600 posjetilaca bodrilo je oko 400 učesnika, koji su izveli 57 sadržaja u više od pet sati programa. Udruženja koja su učestvovala su: „Bosanska krajina” Malmö, „Ljiljan” Landskrona, „Bosna i Hercegovina” Värnamo, „Bosansko hercegovačko udruženje“ Jönköping, „Bosna i Hercegovina” Gislaved, „Bosna i Hercegovina” Norrköping, „Zlatni Behar” Västerås, „Behar” Göteborg, „Bosna” Borås.

Na Smotri su se obratili predsjednik Saveza Adnan Mahmutović i predsjednica BHŠSŽ-a Fatima Veladžić, koja je naglasila da ova dva saveza imaju izvanrednu saradnju na svim poljima. Ujedno je i BHŠSŽ bio dio smotre svojim učešćem u holu ispred sale.

Sve sadržaje ocjenjivao je stručni žiri u sastavu: Lejla Caušević Karačić prof. pjevanja i mag. Etnomuzikologije, te Muhamed Softić eminentni stručnjak i poznavalac folkloru i običaja u BiH.

Za najuspješnije udruženje u 2024. godini proglašeno je „Bosna i Hercegovina” Värnamo.

Program je bio izuzetnog kvaliteta. Izvanredni nastupi horova su rezultat organizovanja seminara za voditelje horskih sekcija i koordinatore Amira Islamovića. Folklorni ansambl Saveza, koji je predstavljao pravo osvježanje, dostigao je novi nivo uigranosti i raznolikosti organizovanjem seminara (Kenan Jašarspahić i Amel Mulalić).

SPORT



Ekipa Saveza učestvovala je na XIX svjetskom prvenstvu BiH dijaspore u futsalu održanom u Travniku 3-5. maja 2024 god. Ispred Saveza u organizaciji je bio Meho Kapo. Savez nije imao mogućnosti da, kao što je to tradicionalno, finansira niti izborni turnir niti odlazak ekipe na SP, što je zasigurno uticalo i na rezultat Švedske ekipe koja je dostigla četvrtfinale.

SSDBIH



Učešće Saveza u radu Svjetskog Saveza Dijaspore (SSD). U okviru SSD BiH, ispred Saveza učestvovali su Adnan Mahmutović (po funkciji, a kao redovni član Upravnog odbora SSD BiH) i Meho Kapo (član nadzorne komisije SSD BiH). Predstavnici Saveza bili su dio godišnjeg Kongresa SSD-a 5-7. jula u Sarajevu, kao i prilikom obilježavanje Dana nezavisnosti BiH u Briselu a zatim i na SP Futsal Vlašić (3-5. maja). Do kraja godine predstavnici Saveza učestvovali su na sjednicama odbora i u planiranju aktivnosti kroz radne grupe zadužene za domene kojima se bavi SSD BiH. Financiranja rada unutar SSD BiH bio je volonterski.



KUSERVI ŠVEDSKOG JEZIKA NA UNIVERZITETU U SARAJEVU

U drugoj polini godine ostvarena je saradnja između Univerziteta u Sarajevu (Vahidin Preljević), Saveza (Amela Fifić i Adnan Mahmutović), Ambasade BiH u Švedskoj (N.J.E. Bojan Šošić) i Svenska institutet s ciljem da se pokrene lektorat i švedskog jezika na Univerzitetu u Sarajevu. Svenska institutet je donio odluku da finansira dvije radionice švedskog jezika u 2025. god. Program je zvanično otvoren u Sarajevu 18. decembra 2024. god sa švedskom ambasadoricom u BiH, N.J.E. Helena Lagerlöf.

INICIJATIVA MATERNJI JEZIK I DVOJEZIČNOST

Inicijativa Maternji jezik i dvojezičnost – ključ boljeg razumjevanja – MMA.

Inicijativa je pokrenuta 2015. godine sa ciljem da se aktualizira važna oblast u radu naših organizacija tj. važnost izučavanja bosanskog jezika u Švedskoj. Azra Jelačić imala je mandat da vodi i koordinira rad u okviru ove inicijati i da organizuje susrete Bh. organizacija na čelu sa Savezom. NBV podržavao sve aktivnosti vezane za rad sa MMA na saveznom nivou do kraja 2023. godine.

U 2024. godini podrška NBV-a prebačena je na regije. U februaru u protekloj godini ostvarena je saradnja na regiji JUG i u sklopu te saradnje organizovan je MMA susret u Landskroni. Susretu je bio jedan od najposjećenijih na kojem je učestvovalo preko 130 članova sa regije BH regije Skåne.

INFORMISANJE

Informisanje članica Saveza i javnosti vrši se putem Emaila kao i Facebook stranice. Informisanje je stalna aktivnost Saveza koja zahtijevamaterijalne i kadrovske resurse. Nova webb-stranica je znatno bolja u odnosu na protekle godine i još uvijek se radi na razvoju iste.



INICIJATIVA „GLAS BIH U ŠVEDSKOJ”

BHRF je zajedno sa drugim organizacijama sa bh. predznakom pokrenuo inicijativu „Glas BiH u Švedskoj” čiji je cilj da se kroz veću sinhronizaciju saveza, udruženja, mreža, i ostalih organizacija sa bh. predznakom, maksimizira angažman u cilju očuvanja kulture pamćenja i edukacije švedskog društva o agresiji na BiH. Više detalja možete naći na bhsavez.org/glas-bih-u-svedskoj.

U inicijativu “Glas BiH u Švedskoj” uključili su se: BHRF, BHŠSŽ, BHKRF, IZBUŠ, APU Network, BHUF, Bemuf, BHNS.